

N. 2. 4

PROTESTA- TION DE PAR

MONSEIGNEUR LE

Prince de Condé.

*Avec l'Aduertissement faict sur
ladicte Protestation.*

~~CHAPITRE~~

M. D. LXVIII.

PROTESTATION DE PAR

LE MONSIEUR LE

Prince de Condé.

1561

F

39

326

Avec l'Admiration fait par
Jadis le Roy
THE NEWBERRY

1561

M. D. I X A

PROTESTATION

DE PAR MONSIEUR

le Prince de Condé.

En ce sens, fin qu'aucun ne preient

Aide de cause d'ignorance des

justes occasions, pour les

quelles ledict Seigneur Prince s'est

accompagné de grand nombre

de Seigneurs, Gentils hommes

& autres de l'une & l'autre Re-

ligion, pour aller trouver sa Ma-

iesté, il desire que chacun en-

tende son intention, & de toute

sa compagnie, n'estre autre que

pour supplier ladicte Maiesté de

vouloir conuoquer & assembler

les Estats de ce Royaume, à fin de

pourvoir aux foulles & oppres-

sions de son poure peuple, abolir les subsides, surcharges, nouueaux tributs & exactions, qui luy ont esté mises à sus, & imposees depuis quelque temps par la malice des Italiens: & remettre toutes choses en leur premier estat & splendeur, au soulagement de ses pources suiets. Defendant expressement ledict Seigneur Prince à tous ceux de sa compagnie de ne fascher, trauailler, ne molester aucuns, de quelque Religion qu'ils soyent, en leurs biens ou personnes, sur peine de la vie: mais viure amiablement, & se cōporter doucement les vns avec les autres, suivant les Edicts du Roy.

ADVERTISSEMENT

SVR LA PROTESTATION

de Monseigneur le Prince de Condé.

'Est vne chose bien mal-aisée, en la
C meilleure entreprise du monde, de
pouuoir satisfaire à tous, à cause des
iugemens diuers, & des passions du tout con-
traires à l'inquisition de verité. Ce que ie voy
estre aduenü sur la Protestation de Monsei-
gneur le Prince de Cōdé, qui a voulu declarer
à tous le zele qu'il porte au bien public de ce
Royaume, accablé d'une infinité de maux, par
les iniustices & oppressions, impôts & subsi-
des, gabelles & tailles, qui ont esté mises sus
& augmentees, au temps que le pource peuple
en espéroirestre soulagé.

Vn chacun s'en plaind & en gemit: les do-
leances en sont ouies, & en public & en parti-
culier: on en demāde les remedes: les cōplain-
tes & remōstrāces ont esté vaines, & sōt tour-
nees en indignatiō & menaces. Et pour toute
respōse ou raison, on n'a iamais peu tirer autre
chose, sinō que le plaisir du Roy est tel, auquel
il n'est licite à vn peuple de cōtredire. On fait
toutefois que le Roy n'a intelligence de ces

choses, mesmes en cest aage, & qu'il ne co-
gnoist l'oppression & misere de son peuple:
Que toute audience & iustice est deniee par
l'astuce de ceux qui possèdent & manient tant
le Roy que le Royaume à leur plaisir: Que les
Princes & Seigneurs, qui pourroyent donner
aduis & remede à tels desordres, sont eslon-
gnez du Conseil, accusez cōme perturbateurs
du repos public, & menacez de grieues pei-
nes, en sorte qu'ils ne peuent auoir seut acces
vers sa Maiesté, sans danger euident de leurs
propres vies. Que pourroit faire vn Prince du
sang royal en telles destresses, oyat la clameur
publique, voyant les loix anciennes de la pa-
trie violees, les edicts enfrains, le peuple foul-
lé, la Noblesse opprimée, & tout ordre ren-
uersé?

On dira que son deuoir estoit ~~de~~ remon-
strer ces choses paisiblement au Conseil du
Roy. Ceux qui parlent ainsi, auroient quel-
que apparence, s'il ne s'estoit acquitté de ce
deuoir par tāt & tant de fois, qu'on n'en pour-
roit requerrir d'auantage. Car tant par lettre
que par viue voix, tant en public qu'en priué,
il n'a cessé depuis quatre ans de remonstrer, &
au Roy, & à la Roynne sa mere, & à tout le
Conseil, les dangers qu'il voyoit aduenir, avec

vne confusion horrible en ce Royaume, des
nouuelles inuentions auancées par quelques
esprits frefillans & subtils: par lesquels main-
tenant vn Edict de pacification estoit escorné
& changé, maintenāt nouuelle charge & sur-
charge imposée au peuple, maintenant la No-
blesse recerchée par surprise, maintenant nou-
uelle calomnie esparse, tant contre luy, que
contre les Seigneurs de ce Royaume, qui ont
embrassé la Religion reformée, pour les acca-
bler de faux blâmes, & les rendre si odieux,
qu'on ne les daignast escouter, ou plustost fai-
re que le peuple s'esleuast contre eux, comme
s'ils estoient ennemis du bien public. Sur ce
qu'il a remonstré par tant de fois, on l'a tou-
iours payé de belles paroles & de flatteries,
desquelles on a pensé l'abuser. Et cōbien qu'il
ne s'en peust contenter, si aimoit-il mieux en-
durer & dissimuler, attendant quelque amen-
dement, que de se monstrer plus aspre auant
le temps.

Car il ne pensa iamais qu'on en deust venir
au point, auquel il a esté poussé & contraint
par la malice des contredifans. Il a veu qu'au
lieu de rien amender ou reformer, tout empi-
roit, & que pour augmenter le mal, & mettre
vne extreme oppresseiō sur tout ce poure peu-
ple

ple, on faisoit venir forces estrangeres, pour
establis en ce noble Royaume vne pure ty-
rannie, voire qu'on taschoit d'y introduire
sous belle couleur les ennemis coniuers de la
Couronne. Et quand il a continué à faire ses
remonstrances, il s'est veu en extreme peril de
sa vie. Il a esté appelé, puis renuoyé, semond,
puis repoussé, flatté, puis brauadé & menacé:
bref, pourmené & pelotté, comme si on eust
voulu faire vn ieu de luy & de toute la No-
blesse en sa personne. Parquoy voyant raison
& equité bannie, que droiture & humanité
n'auoyent plus de lieu, & qu'on ne faisoit que
luy iouer des tours & ruses de Cour, il se reti-
re en sa maison, faisant entendre à toute la
Noblesse, tant d'une que d'autre Religion, le
peu d'espoir qu'il auoit de pouuoir obtenir
par les moyens ordinaires le soulagement re-
quis & souhaité. Estant ainsi retiré, il eust esté
deliberé de se tenir coy & paisible, & eust cō-
seillé le mesme à tous autres, si le deuoir de
Prince Royal & sa conscience ne l'eussent
esmeu & sollicité de preuenir le danger tout
euident & eminent, non seulement au peuple
François, mais aussi au Roy & à sa Couronne.
Il s'est souuenu des oppressions, desquelles il
auoit ouy de long temps les doleances: des
plaintes

plaintes & gemissemens qu'il auoit tasché de
adoucir & appaiser par tous moyes qu'il auoit
peu, attendant quelque meilleur ordre.

Il s'est proposé deuant les yeux l'accroisse-
ment des maux qui sont suruenus, & presque
paruenus iusques au comble, ausquels il n'e-
stoit plus possible remedier, qu'en ayant re-
cours aux loix & coustumes anciennes de ce
Royaume. Et pource que telles loix estās mi-
ses en auant, on ne s'en faisoit que mocquer,
& qu'on n'en tenoit non plus de conte que
de vieux haillons, ou vestemens derompus,
ou bien il sembloit qu'on fist des contes de
Fierabras, il a pensé qu'on ne profiteroit rien
d'en requerer l'obseruation tant de fois reiet-
tée & violée, s'il n'y auoit vne instance bien
urgente. A quoy il voyoit la meilleure partie
de la Noblesse bien disposée, pour auoir esté
traitee indignement, foulée & opprimée en
plusieurs lieux, par l'importunité de ceux qui
manient tout ce Royaume à leur guise. S'il
n'eust eu esgard qu'à sa personne & aux siens,
il se pouuoit tenir à son aise, & en plein repos.
Car iamais homme ne fut plus cheri ni mieux
caressé de ceux qui sont à l'entour du Roy,
& du Roy mesme, quand il se faisoit de ce
qui attouche au public: mais incontinent qu'il

commençoit à toucher cest vlcere, la bonne
chere se changeoit en mescontentement &
desdain. Ce n'est point donc vne cause parti-
culiere qui l'ait esmeu, ou iniure qu'il ait re-
ceüe pour son regard. Car toutes les indigni-
tez qu'il a receues, ont tousiours esté pour la
cause commune, receuant au reste tout l'hon-
neur & la faueur qu'il estoit possible. Voyant
donc le Roy en ce ieune aage saisi, & enuirō-
né de ceux qui luy mettent de si mauuaises
impressions au cœur, qu'ils le font incessam-
ment desfier des siens propres, & l'animent
cōtre ses suiets, & au lieu de l'instruire à dou-
ceur & benignité, l'incitent à cruauté & vio-
lences, corrompans du tout le bon naturel
que Dieu a mis en luy: n'a-il point deu estre
esmeu de compassion, pour empescher autant
comme il luy est possible, la perdition d'une
si florissante ieunesse, & de tout l'Estat de ce
Royaume? N'est-il point tenu, comme Prince
du sang royal, ayant obligation naturelle, &
serment à la Couronne, qu'il voit aller en de-
cadence, s'opposer à la tyrannie & violence
exercee par ceux qui ne demandent que leur
profit au dommage du Roy? qui le repaissent
de mensonges & flatteries, qui le nourrissent
en toutes voluptez desordonnees & infames,

pour luy oster le sens & l'affection d'entendre à ses affaires, & à son Estat? Et toute la Noblesse n'a-elle point vne semblable obligatiō & serment special & solennel de conseruer le bien public, l'Estat du Royaume, & la Couronne, destournant tout ce qui y peut nuire, & procurant tout ce qui la peut dresser, & auancer? Pour ce faire ils requierent rous, que les Estats soyent tenus, à fin que les loix du pays soyent remises en vſage, les oppressions ostees, & la liberté restituée. Et d'autant que pour empescher ceste liberté, les forces estrangeres ont esté amenees au Royaume, en comparant encōres d'autres plus grandes & voisines, comme il est assez notoire, ils ont estimé ne leur estre seur de faire instance sur leur requeste, s'ils n'estoyent aussi de leur part munis de quelque defense, de laquelle ils n'ont eu intention de nuire ou offenser, mais se conseruer seulement de la violence, dont ils ont esté expressement menacés, après la belle resolution prise en ce dernier voyage de Picardie.

Et quant à ceux qui ne se contentent de ce que mondit Seigneur le Prince ne fait aucune mention de la Religion reformée, pour laquelle il leur semble plus loisible de prédre

la defense de tout l'Estat du Royaume; ie les prie vouloir considerer que le peuple de soy-mesme a esté de si bon accord, rendant obeissance au Roy, de quelque Religion que ce fust, qu'on auoit occasion de se contenter. Que ceste vnion a bien despleu à ceux qui ne demandent qu'à pescher en eau trouble, & que pour entretenir leurs ambitions & grandeurs, ils n'ont cerché que les moyens d'entretenir les diuisions & factions à la façon d'Italie. Pourtant ils ont tousiours suscité des risons infernaux en plusieurs villes, pour y allumer le feu de discorde. Ils ont empesché les punitions des homicides, seditieux & mutins, des violés & oppresseurs, pour rédre les pires les plus forts, & affoiblir la meilleure partie, & par ce moyen balancer & tenir en bride, & à leur commandement, ceux que bon leur sembloit. Ils ont enuoyé des trompettes de sedition, des caphards sanguinaires, qui enflammassent le peuple à meurtre & effusion de sang. Et neantmoins le peuple, pour la plus part, s'est contenu, chacun cognoissant assez, qu'il ne pouuoit ruiner la maison de son prochain, sans mettre la sienne par terre, ni oster la vie à autrui, sans mettre la sienne en danger. Ces ruses tendantes à l'entiere subuersion

du poure peuple, ont esté assez manifestes. Estans donques suffisammēt cognues à mondict Seigneur le Prince, & à toute la Noblesse, ils ont deu embrasser la defense entiere de tout le peuple, sans aucune acception de personnes, ou de Religion, & auoir leur regard à l'estat public, duquel depend ou l'establissement ou la subuersion du Royaume. Car là où il est question de soulager les vns & les autres des tributs & exactions imposees, il faut mettre à part toute difference. Si doiuent estre aduertis tous ceux qui ont affection à Dieu, au Roy, à leur patrie, à l'observation des loix anciennes, à la liberté Françoisē, qui est opprimee, s'ils desirent quelque allegemēt & meilleur estat, ne s'amuser à ceux qui imaginent tels scrupules, pour obscurcir la vraye, la clai~~r~~ & iuste defense. que mondict Seigneur le Prince & la Noblesse ont prins en main, mais se ioindre à la cause, s'ils ne veulent eux-mesmes estre coupables de l'oppression machinee sur ce poure peuple & sur sa posterité.

Sonnet au peuple François.

Pour peuple François, voy la traistreuse amorce,
Et les mortels appas sous le haim se cacher,
Que dans ton noble corps on taschoit de ficher:
Voy les meschans complots meslez avec la force.
Dessille ores tes yeux, & repousser t'efforce
Ceux, qui par le moyen de toy-mesme arracher
Te veulent ta vigueur, ta vie, & empescher
Le Roy en tout excès, pour luy donner entorce,
Et toy d'autre costé ce grand Prince du sang,
Qui marche pour son Roy, pour luy garder son rang,
A toy ta liberté antique, où il t'appelle,
Loin-toy à la Noblesse: & à la fin ton Roy
Cognoistra (quoy que tard) ceste immuable foy,
Qui du gentil François rend la gloire immortelle.



